



## ***Fasnachtsplakette 2016***

### **Mer mache dicht**

S Motto haisst, mer mache dicht.  
Doodrzue basst grad die Gschicht.  
Ich wott in e Laade goo.  
Dert haissts, dä isch nimme doo.  
Vor zää Daag duet dä no wäärbe.  
Hit wirbt är fir s Laadestäärbe.  
Noo däm frogt mi aine glatt:  
Goosch du z Basel no in d Stadt?

Mängge Laade isch nimm z redde.  
Bildlig zaigt is daas d Blaggedde.  
Lueg, am Waggis loots kai Rueh.  
Är macht jetz sy Laade zue.  
Uff dr Kupfer nur e bitz.  
D Silber zaigt, es isch kai Witz.  
Vo dr Gold my letschte Bricht.  
Jetz isch au dä Laade dicht,  
aber s Bijou het mi gfrait,  
well en Alti Dante sait:  
Waggis, syg jetz nit so muff,  
noo drei Daag machsch wider uff.

D Kupfer, d Silber, d Gold macht dicht.  
Wiene Film lauft doo die Gschicht.  
Und dä Film kasch du elaiige  
jetz als Duumekino zaige.  
Dass das goot, kaufsch fir dy Schatz  
daas Mool grad e ganze Satz.  
Dasch nit dyyr, drum machs ganz still,  
vor dy Schatz en iphone will.

Wär vo Film e bitz verstoot,  
frogt an wär dr Oscar goot?  
Zerscht gits aine fir d Regie.  
S mues dr Guido Happle sy.  
Und als Produzänt nimmt hit  
au dr Müller no ain mit.

Soo wird in dr Oscarnacht  
z Basel au d Blaggedde gmacht.  
D „Filmacademy“ juhee  
isch jetz **s Fasnachts-Comité**.